

王叔果坐
山齋稿

己未四月
朔初
属題
姚華

丰山藏稿

共 4 册 存 4 册 排架号 09534

西華先生文集序

歸安茅

坤謨

予同年廣東按察使王公德數稱從兄西華並暘谷風神藻雅當於晉之王逸少唐之白香山無以異者予抑竊嚮往之數獲締交云已而西華先生沒其子寧國使君光蘊遣使函先生詩文彙二十卷屬予序予再拜稽首而誦之颺言曰大較先生澹蕩不羣故其發為詩歌文章之什雖第進士軒冕仕路而其心因已冷然遊於丹山綠水紫芝瑤草之間古所稱物外司馬是也其所首可考見者半山賦賦之次湛天池浴日月羅巖岫珍泉石與夫盤桓謝眺青嶺猿登即其中所醞釀處故其珥筆抽毫所向粲然戛金石掉雲霞鏗黃鐘鳴大呂令人讀之若將入少室終南之宮而與角里綺季相為揖讓其閒他雜著上下二卷尤為卓犖侷儻可謂碣石蓬島之邃而與世之遊氛浮埃杳不相及嗟乎茲固當與日月

俱遠傳之無數者已足為序

王西王西華先生半山藏彙序

宣城湯賓尹謨翰林院

貴富壽考文章功業之類物之美者人爭取之矣夫美物必有神
焉司之物忌完取忌多天之數也人之情也孤庸之子憤其獨力
爭之旦暮之間於數者偶一焉而沈頓歲年剝刻筋力精已耗矣
遑及其餘故欲膏易足而取於天者膏寡開敏賢智之士饒姿才
廣方畧其意氣無所不之造物之內苟有以為美者則高才先之
矣且世開敏之士多世族焉出也貴富所自有矣宮廬服輿食飲
聲色之奉皆有以過人孰非天之寵與既已飽此又侵彼焉生人
之情曷有已乎與者忌少取者忌多不讓人以贏而留鬼神以餘
所得滋多其損也滋甚夫貴官顯爵殊功偉伐高才能文章名譽
驚絕皆造物之忌也有道者之所不兼取也博物多才美華剝剝

今古又文章之忌也作者之所不出也蘇子瞻云楊雄好以艱深
之詞文淺近之說夫楊氏之學亦復不淺矣露文白意淺而出之
即子瞻亦當引心自負竒博不肯捨置豈千載而下猶未免為人所
窺請才勝而不降學博而不能割斯亦多取之報也郡大夫王君
刻其尊人西華先生藏集於衙齋余得以觀焉所為詩若文大要
性靈發之嚴於矩尺絕無虛華蕩肆之態似代之爭工於形似者
初先生投藁篋中曰吾無意於文何以示人夫古之論文非能為
之工乃不能不為之工而弇州之銘先生也亦曰幾不盡秘乃有
文言深於先生之意可以知文矣先生連代為貴人世其學登第
四十年居官僅八歲退而老於半山故所讀書處蔬食布衣吟誦
不廢若諸生先生之取於世蓋多所不盡之思也郡大夫為廉吏
一介不取王氏之長此物此志爾眾之論先生也以行以文余之

論先生也以意夫意有所不盡取者君子之所以還造物而詒後人也

明萬曆庚子春李吉翰林院編修宣城湯賓尹撰

半山藏稿卷之二十一

王叔果半山藏稿

永嘉王叔果音德著

賦

半山賦有序

族孫賡堯寔真子謹



王伯子叔果蚤歲依母宜人丘隴脩業山中耽寂
挾勝泉壑幽邃亭之臺之林麓榛莽徑之圃之叢蔭
區芳聲振於空谷入仕以來日就荒落幸以投閒之
遂稍身葺理之勞頃緣風雨悵觀飄搖爰屬計於兒
曹乃增飾夫故緒為門為徑為洞為湖中羅之境易
觀考槃之樂可託漫述短賦以告山靈

粵大羅之蟠鬱兮表東越以彪靈駛半山而宅區兮
排壘嶂於青旻屹崇岡之亘護兮渺入望於滄溟湛
天地之浩蕩兮浴日月而

耀明匝林塘以合秀兮涵萬象於虛清美立丘之卜藏兮標物色
 於圖經啟精廬之爽塏兮羅巖岫於疎櫺蔽松蘿之暝翠兮紛霧
 翳而霞蒸既辛勤以羨課兮亦宛轉而披荆蕪遊息於藏脩兮珍
 泉石之嬰情繚碧為園兮曲澗浮英振衣為臺兮峭壁紆青厨脩
 竹而羞醕兮俯平崖以濯纓啓沓石而穿洞兮肇錫以華陽之嘉
 名睠流泉之飛灑兮噴四壑而雷鳴瀉沙溪以瀦滙兮瞰潭水之
 淵澄爰觴咏而結榭兮稱最景於斯亭繫吾生之寡諧兮寄夙好
 於幽貞相烟霞以託跡兮狎魚鳥而忘形舒盤桓於謝眺兮擬清
 嘯於孫登甘仲氏之樂志兮齊子真之耦耕抗玄風於高朗兮將
 茹素而遺榮俄世網之我羈兮嗟浪跡之猶萍恨猿鳳於空林兮
 逝長風而拊膺幸遇乎初服兮念故業之飄零理芳構於巖居兮
 追釣遊而締盟已矣乎曩余臚此山兮將矢言於弗諼也胡時亨

之偶違兮乃荒索而中睽也頃屏絕以適茲兮從吾好而卒歲也
 採春穠兮芳菁聽谷鳥兮嚶聲蔭夏木兮忘暑踏層壑兮如冰擷
 蓉菊兮秋艷浥玉露兮泠泠策寒梅兮小嶺嗅暗香兮素馨晨昏
 兮風雨水月兮洞雲浮蓮舟兮湖上傾尊酒兮巖研硯宇宙寥廓
 飽泉石兮幽襟追英賢兮晚節將綺皓之齊稱樂由夷兮蕪景聊
 屬志於後生感今昔之流晷考槃邁軸試勒夫中羅之銘
 才華典贍筆意高超洵歸隱之樂致也

東山賦有序

吾郡環九山而城志稱九斗東為華蓋山山之麓為太玉洞
 天有墨池里晉王右軍守郡時洗硯處也先少參東崖翁往
 讀書於茲愛其勝晚歲遂卜居焉頃仲氏陽德甫闢地為園
 引徑通華峰時從登覽庶幾家山矣乃以暇日賦之辭曰

繫名山兮九斗聳華蓋兮摩空兆雄城兮白鹿瑞氣兮青虹開
洞天兮太玉瀛靈兮流淙滄墨池兮飛霧恍逸少兮詞峰紛綺疏
兮萬井爛金相兮祠宮簇繁華兮烟市藹蒼翠兮空濛標幻跡兮
三生之石拱玄區兮五粒之松燁飛霞兮丹洞浮石龜兮巖猗林
鐘梵樂兮依微噓應紫芝瑤草兮何彼鮮穠榜通真兮靈素化容
成仙翁隱巍峰兮構宇鬱佳氣兮麓葱竦孤亭兮絕頂舞鳶鶴兮
天風吸長江兮一碧萬頃繚川原兮疊嶂千峰媚孤嶼於中流兮
弔文山之孤忠渺石門於迴浦兮想謝公之遺蹤挹羅浮兮瑤島
曠文筆兮崆峒彼北固之枕江兮城鐵甕而稱雄伊吳山之鉅麗
兮表勝槩於寰中美茲境之足媿兮顧遐僻而蒙茸蕙山林於城
市兮幸卜勝於先公家園窈窕兮華徑迤通竹樹蔽虧兮最景誰
同羨余生之微尚兮夙託志於冥鴻賦歸來而遯跡兮擬大隱於

墻東癖烟霞以寄傲兮奚羨素封快茲山之跬步兮登眺時從集
耆英之會兮孰誇司馬侶江湖之散兮不數龜蒙繼芒鞋兮筇屨
振玉塵兮詩節餐松柏兮踰蘿薜茹芝朮兮褰芙蓉林塘賡咏兮
池草春融丘園藉賁兮樂付天工採清謠以矢音兮白叟黃童儼
鶴馭於厓東兮仰止無窮

半山詩藏編卷之二

詩 溪亭小集

永嘉王叔果青德著

山中霽景佳况值清和節平崖翠欲流峭峰青可擷灌木結層陰
玄潭湛寒潔臨池任逍遙登臺更披閱翠竿不停揮青衿儼成列
咏歸趨中林斜陽在崖穴

癸卯春日山居

捲幔春歸燕焚香晝掩扉齋居忘世慮靜悟識天機雨積滋苔蘚

雲深長蕨微蹉跎時序改徙倚惜芳菲

山齋聽雨

倚枕候鷄鳴浙瀝雨聲曉玄陰鎖巖霏緒風振寒篠展卷對爐烟
虛齋絕紛擾抱冲境逾幽屏息神還峭春彼白社盟言寄青霞表
悵然念世囂窮年詎能了

改闢山園

養痾事玄脩抱策沿清瀨引泉自巖阿宛委若紆帶藤蘿翳短垣
烟霞敞空界荷鋤坐松根為樂且忘懈選勝愜素心探幽自足愛
於焉任逍遙散步斜陽外

登東昌先岳樓

北城一別三千里東郡初登百尺樓玉礪金楹跨紫陌彤雲瑞靄
接神州坐瞻岱嶽寰中眇俯挹黃河掌上流惆悵南天還極目

山易水兩悠悠

壽鄔都閨母

繡閣娛初度轅門早乞身投戈逢盛世戲綵屬芳辰王母傳瑤果
麻姑薦玉津年年挾仙侶共醉綺羅春

甲辰中秋臥病次景暘姪山中見貽韻

零雨灑秋夕遙空淨埃氛出門展晚步愛此良月新明星隔河漢
感之惜離羣負病經時月懷抱多荆榛屏書息交遊兀坐無一欣
服藥求去病何辭苦與辛羈迹在樊籠焉能謝世紛由來曠達士
玩世冷隱淪葆光衡門下洗耳清溪濱隆中臥諸葛谷口棲子真
吾自東徼尚寤寐惟古人玄度邈難覿千載有遺芬烟霞本夙好
思欲躡清塵趨來秋氣佳矧茲風月辰脩脩北窗竹靄靄東園雲
舊盟豈不念其如孱廢身山居茹玄潔可以頤元神感子招隱意

山中東友人
振履飄飄遊列仙芳游
喜及暮春天墜高漫假
停雲賦招隱遂歌依木
篇我樹香塵松烟日一
林翠翠竹浮烟飛觴
多有蘭亭集乘興誰
移刻曲船

何當報殷勤，牀頭發新釀。一觴聊賦君，無緣赴清賞。千山搖夕曛，
怡齋為歐陽兵憲尊公賦

習隱渾忘世，遺榮蚤息肩。久稀青瑣夢，終締綠蘿緣。種菊追陶令，
捫松訪葛仙。雲林同豹隱，霄漢看鵬騫。有美昭來許，何妨白未玄。
彩輝萊子服，青印廣文龜。堂古槐陰匝，簾垂日晷延。靜依高竹坐，
閒據槁梧眠。鱸膾因風憶，龍團帶雨煎。林端鳩杖出，花外鹿車旋。
曉日靈山屐，春風蕪瀨船。徜徉多樂事，導引得仙詮。肥遯心逾逸，
冥栖道自全。道遙觀變化，潦倒欲逃禪。瑞氣通瑤島，靈根種福田。
芝蘭芳可擷，龜鶴總忘年。

九日遊龍潭

共結茱萸會，行參鸞鶴羣。曙林開霽色，秋水燦霞文。寶地三花聚，
懸崖一徑分。神龍棲息處，霸氣正氤氳。

送張文洲司理遷京兆

有美甘陵彦，分符越水湄。家聲傳紫綬，道化洽黔黎。政比劉寬恕，
人懷邵曄慈。祥刑歸克允，蘇役頌平施。草野流膏澤，閭閻絕繭絲。
松筠堪並操，水鑑信無私。六善殊功奏，三河妙譽馳。循良標漢史，
豈弟詠周詩。錫典頒烏府，徵書下鳳墀。子容膺士望，若水受君知。
寥濶青雲武，孤高玉樹姿。行舒千里足，快覩九苞儀。梓里榮新渥，
桐鄉繫去里。羊公有遺愛，應勒岷山碑。

乙巳暮春入山

別此方歲寒，茲來韶景淑。叢篁翳繁陰，庭宇闕清穆。巖花閒色開，
迎風散幽馥。徘徊恣賞心，應接無暇目。踰時坐塵羈，到此如脫梏。
束書未及觀，披拂趨南麓。松下逢山翁，殷勤敘寒燠。矯首指斜陽，
聲聲招黃犢。為言豐林中有虎，踞巖宿日暮。不可畱清晨，訪茅屋。

山居午睡起

偃息惟高枕恬然午夢清一真還自悟萬慮寂無生山鳥催耕候
風篁解箨聲因之感芳歲呼酒坐前楹

山居東張蚤江表兄

積雨空山寂相思隔暮雲
趨來頻入夢
修爾念離羣
滴硯收花露
寒帷引蕙芬
何當來玉麈
尊酒共論文

繚碧園成諸友小集十二韻

玄圃迎秋闢靈源引望長紆青來几席分碧自天潢水學環滁轉
山疑繡幄張棲真侔少室選勝敵濠梁蓬戶連雲翳霞標閃日光
賞心多妙善卽座列幽芳鳥和松簧奏花臨水鏡粧載賡康樂詠
試引永和觴列籍依清淺褰衣躡莽蒼蘇門方寄傲彭澤已開荒
對境心如洗探幽願獲償高朋時宴集清詠託求羊

改築山池成移菊集賞有懷仲弟不與

對菊延秋賞臨池命曉筵何年鑿鬼斧此日滙仙源雲瀉朱欄淨
波縈錦石聯凝流浮碧玉浴景倒青蓮信美茲辰憇臨風憶惠連

菊下小酌

種菊蔚成林花時足賞心雲籠千樹錦日耀一叢金引酌依芳藻
閒註託素琴東籬隨嘯傲千載仰知音

山堂集諸君賞菊

霜薄園林候氣清寒花三徑別叢英香風結綠含風細艷質分黃
濯露明攬秀漫誇霜下傑伴幽宜結歲寒盟共看洛社人方醉更
喜湘江賦欲成

梅軒為孫君賦

玄冥布重陰郊園變辰序羣卉薄嚴威零落自此始惟茲庾嶺芳

獨秀中林起，移植當軒隅。悠然架寒水，迎陽綴仙葩。暗香度文几，故避艷陽天。不與眾芳齒，緬懷貞素姿。卓彼幽人履，草木有臭味。玄覽悟深旨，猗蘭被朱紵。說蓮署青史，不聞五柳翁。亦有六逸子，仰希往哲踪。邈矣追靈軌，芬華豈不娛。悅茲清淨理，卽物寄深情。忘形任賓主，結盟歲寒期。終焉謝塵緇。

過龍翔寺贈石室上人

遠師早出人閒世，一住空門積歲年。海上大顛長入定，湖中琴操竟逃禪。珠林坐對談空色，寶地行歌繞瑞烟。此日相逢疑隔世，輪迴莫漫問西天。

壽張石川納言

昔年奉使下江城，海上千花擁旆明。九斗雲山經灑翰，五湖烟水獨揚舲。玄芝滿地仙英粲，青鳥銜觴瑞彩迎。却愛天方池上客，茲

來芳社會耆英

贈地師余慵菴三首

江湖萍跡喜初并，尊酒燈前念舊盟。獨撫青萍指牛斗，遙瞻紫氣在豐城。

予往丹丘踰十年，山中幽勝日攀緣。仙翁倒杖經行處，木茂風藏賸可憐。

江上諸峰錦削成，兩溪交匯瀉滄溟。此中疑有神仙蛻，好為停橈仔細評。

丙午春日遊仙巖梅雨潭

尋真遠泛陟香岑，四壁雲垂淨苑深。白晝虛潭長作雨，初春灌木始繁陰。崖文隱約畱仙偈，水碧空明瑩客心。醉倚空林作長嘯，遠天萬籟起清音。

訪蔣雲峰山居

巢壑疏仙宇排雲列秀峰庭紆青野望徑遠碧蘿叢地界流金樂
泉光隱白虹崖傾雲葉綴筵敞露華通狎遊超塵劫標靈羨化工
披榛窮窈窕振策入冥濛卽擬推三徑還因問七松求羊追妙賞
綺皓尚高踪曠達真遺世逍遙欲馭風歌殘芳渚曲酒罷夕陽中
為問陰霏處人言有臥龍

過雲頂寺

雲峰晚憇涉平沙更過祇園訪玉華入座香風繡貝葉緣溪錦石
閒桃花珠林靜綴三危露金策行麾五色霞日暮不妨山簡醉歸
途好借白牛車

山齋夜坐

洞壑春寒悄孤吟對短檠偶因塵俗迴頓覺夢魂清虎踐深林迹

蛙分靜夜聲那堪茲閒寂掩卷獨含情

臨池初築小臺同諸友晚集二首

仙苑門垂綠蔭稠石臺新築坐來幽眼前諸景紛如畫試引芳尊
次第酬

敞罔疎林散夕霏雙潭合沓瀉清輝晚來嘯咏忘歸去却信洋洋
可樂饑

東樓晚眺次景暘姪韻

窈窕朱楹俯碧流閒居敞見水雲幽良苗過雨青如抹遠樹連江
翠欲浮酌茗燒檀移白日垂簾散帙對滄洲年來混跡漁樵侶自
信忘機狎野鷗

弟姪輩赴秋試余病目樓居悵然有作

內觀湛清脩支頤坐高閣何處來清風翩翩動惟幙枕上聽農言

此在下五首之後

起視西田獲婦饁雙樹陰兒浴晴川曲徙倚寄南窗因之念離索
悠悠客路情胡似田家樂柱下尚玄同莊生稱瓠落鷓鴣安一枝
豈必翔寥郭養真以自娛外物任龍蠖

九日遊雙溪

不到雙溪踰十年偶携童冠叩西禪入門古剎荒苔色散近平蕪
落日天菊社風烟悲舊侶沙洲蘆葦漲新阡蓬萊清淺經秋變漫
對芳辰感遞遷

哭景銘姪五首

吾道何顧賴玄穹信渺茫生才應待用如子竟淪亡掛劍心長在
傳家事已荒遙憐棲隱處灑淚白雲長

景銘吾益友金石訂交期詎意論心語翻成絕命辭麟傷尼父泣
鵬集賈生悲切抱高山意援琴空爾思

此五首在九日遊雙溪之前

咄咄誰知己悠悠天喪予華亭孤鶴怨陋巷一瓢虛正氣收河嶽
哀聲接里閭平生同志恨痛絕五車書
念子渾如夢憐余哭未休蕭條惟隱几寂寞倦登樓南阮違歡會
東山謝勝遊隴雲低樹色似結萬重愁
矯矯青雲器吾家千里駒騰驤驚汗血忽漫屈雄圖悶緒雲俱慘
遊魂月共孤愁聞窗外雨夜夜灑啼血

京口夜泊

地迫風聲震江空月色微棲鳥驚不定旅鴈欲何依歲暮思彈鋏
天寒念卷衣家山千里隔幾在夢中歸

寶應湖

日轉洪流盪碧空斷烟疎葦望洋中北通貢道千艘集南紀維揚
八練融掛席御風心獨壯凌波犯斗氣還雄擬將一罇防天險誰

任中流版築功

清河早發

百丈牽江沂逆流攔江風色動離憂令人卻羨南歸棹一夜揚帆
下鷺洲

淮河旅夜

朔風凜凜吹歲晏遊子孤舟發長嘆經旬不見南歸鴈長空坐看
銀河架白雲望斷情何限故園蘭桂悲霜霰

宿遷早發

一夜天風解凍零舟人遶遶戒宵征鄰船少婦報雞鳴展轉寒衾
夢不成何處驚傳輶地聲隔河塵擁小車行

宿遷阻水述懷

嚴霜初戒寒晏陰已成剝河水遇風堅稜稜如劍鏘舟子望風靡

停橈倚川曲杪歲苦淹留虛舟任飄泊益嘆行路難轉憶故園樂
負暄就前楹圍爐坐重幄呼兒發新醅三五遞觴酌伏臘過西隣
笑談盡一握此事真復娛念之仍感觸胡為忽去茲兩地成寂寞

沛上有懷立德弟景暘姪

旅泊經宵幾夢君夢中愁緒轉紛紛沛河南下迷遙望越鳥西飛
念故羣開迹四方憐有志行年三十媿無聞踉蹌漫訝長安遠引
首微茫見五雲

贈羅蒼楚陳月湖

傾蓋仍天末聯舟向日邊榕城雙玉樹清廟兩朱絃陳實英聲藉
羅含逸興偏吐辭輝琬琰結臬並蘭荃邂逅初分席殷勤願執鞭
鵬圖應遠振駕駕恐難前激賞欣同調扳依信有緣更期青瑣闥
共賦紫蕭篇

閘河阻雪

鉤簾坐對雪花飛
曉酌衝寒酒力微
漫愛騰輝流綺席
卻愁飄霰濕征衣

歲暮望臨清不至

殘年冰雪阻天涯
滿地萍踪感歲華
咫尺清源勞悵望
此身漂泊已無家

舟中觀景銘姪遺筆志感

畫舫乘閒檢舊編
簡端遺墨賸堪憐
傷心幾度仍拋卷
隱几蕭蕭獨泣然

臨清除夕東同舟諸友

渺渺征途若未休
星迴驚覩一年周
雲霄未射龍門策
草野長懷漆室憂
海內衣冠欣總集
天涯鴻雁晚相求
椒盤此夜情多慨
垂

白高堂愧遠遊

丁未早春

歲序三陽泰
郊原萬象新
新栖經蠟雪
梅淺上林春
履運偏懷土
逢人屢問津
誰言京邑遠
王氣鬱嶙峋

武清道中

天開韶景麗
地入朔方平
策馬遵芳甸
逢人說耦耕
河水初泮碧
岸柳半含青
忽動田園興
閒關雙鳥鳴

望京城

驢背春風悄
林端曉月明
凍消塵不動
天迴鴈聯征
日耀雙龍劍
雲垂五鳳城
長安知不遠
攬轡欲澄清

出京別鄭秋江

握手臨衢話未終
驪駒嘶斷落花風
無端聚散渾如夢
遮莫棲遲

任轉蓬汨汨紅塵看躍馬悠悠滄海羨冥鴻周南流滯君應念故里鶯花春雨中

東同舟諸友

越客歸舟傍晚移偶偕仙侶坐彈棋未論勝算輸安石且喜高談得惠施旅夜頻回春草夢江天遙結暮雲思相逢漫訂東歸訊白下風烟未可期

天津舟中次陽德弟韻呈陳東治王曉山梁月川

霽色橫波晚更新片帆搖曳度江津檣材自合遺明世花信鶯看及暮春斗酒且歡金縷唱緇衣怕染玉京塵適然忽有臨淵思吾欲東垂滄海綸

舟中觀楊柳梨花偶占二絕

漕河官柳自成蹊背日回春綠蔭齊卻憶來時方雨雪平原搖落

羨鳥棲

梨花似雪倚林端秀色偏宜月裏看隔水香風飄玉界漫誇桃李

滿長安

王曉山招飲次韻答之三首
鬱鬱千林秀嚶嚶雙鳥過占詩饒酒興倚棹聽漁歌柳色拖烟重

蛙聲帶雨多扁舟如入畫一望渺烟波

積水瀾川曲奔波殷地雷輕帆紛鳥度飄絮逐雲來曲宴情方洽長歌望屢迴河清端可俟壯志未應灰天涯悲浪跡海內慶知音雅會慚依玉論交誓斷金林翻紅雨亂隄繞綠雲深無限傷春意臨風託素琴

次陳東治韻

久客風塵倦逢君意氣多新詩傳彩筆瘦影對芳河已協滄洲趣聊為白石歌清霄高枕穩無復夢鳴珂

舟中對月有懷黃南華年兄竹巖家叔

春來三見月兩在渭河陰對景慚虛度含情倍不禁川光浮掌動
柳色著衣深望美成惆悵遵途歎滯淫鳳簫吹竟杳雀舫去難尋
醉眺月沈浦嘯歌風滿林枯蓬銜倒景泗水折歸心未遂南征志
聊為東武吟

歸途紀懷次王曉山韻六首

依依烟柳傍江樓隱隱疎燈照客愁獨夜荒郊眠未穩驚風濁浪
撼孤舟

霧靄浮空網織成避呆蜚鴈望還驚塞予正向淮南去念爾翻為
塞北征

雙飛燕子出林斜來往銜泥逐柳花莽莽乾坤皆逆旅春風到處
即為家

宵來穀雨送微寒寂寂姜惟旅夢殘往事關心驚逝水清源橋下

聽潺湲

予髫年患痘寓臨清

漫著浮槎學遠遊薄霄今已媿雲浮燕山越嶠瞻依迴欲擬張衡
賦四愁

陵上之柏何青青移植古廟棲仙靈輪囷空負干霄器偃蹇荒墟
搏翠屏

臨清聞警

關河促歸程潢池忽聞警妖氛翳中原天狼彗東井承平玩戎機
艱危保首領誰分九重憂坐鎮四封靜月暗烏亂啼豺狐竟昏暝
戍堞咽悲笳畏途劇飄梗憂國并懷歸中宵竊耿耿

南還曠念山居言懷詒同志四首

春源何蕩漭遊子歸路漫烈風晝夜號况乃舟人歎回首睇白雲

因之念家園山川變初景花林發新繁此中多隱彥時復過盤飧
行矣歸去來且盡杯中歡

昔往霜雪繁今來柳依依時序倏代遷感此惜居諸昏雲蔽白日
在在津梁迷彼岸未可登遲歸忽愆期桴海非所志去去將何之
且復和天倪西山行茹芝

朝發河西源暮宿桃花口舟行豈不迅猶在歸心後修途五千里
十年四奔走攬鏡念衰顏二毛忽在首惟餘子年心聊復返巖藪
匪附青雲客何以施永久

混沌本無事末路多識知宵人貪天功達士能知幾所貴順元化
何心牽合為譬彼鷄與鵬飛止各有時抗策還南山棲自枋榆枝
靜言養脩翎濯濯向天池

舟出閩河次陳東冶韻

欵欵微風約柳花徐方雲物望中賒長空暮倚昆吾劍新水春浮
博望槎大澤微茫餘王氣高臺栖泊鎖烟霞故山南去滄溟近頰
首長途悵物華

淮上與陳東冶王小冶梁月川分舟短歌贈之

淮南寂寂春已過沙州新綠滋靡蕪登臚振衣眺落日夕霏歛艷
橫金波綺席聯芳藻青絲引玉壺舉杯得新月一笑朱顏醜春茲
一日雅並涉萬里途苦樂與君共慷慨為君歌逝波趨大壑流光
馳織阿良辰并佳會俯仰能幾何君將弭棹秦淮里予亦乘風渡
揚子三山京口競奔迴雙闕雲間對起壯觀憑紆湖海家居停喜
東南美後湖此際盛紛華相約尋芳弄烟泚

夏日雞鳴山房

越歲倦征途尋幽此投跡衡門結翠陰複磴滋苔碧豈翳陟降勞

樂與煩囂隔恰恰鶯語嬌裊裊爐烟寂午夢到華胥
吟學莊鳥此地足逍遙胡為事咄咄

晚步

過雨蛙聲遍草萊斜陽倒景見香臺
振衣晚憩藤蘿外閒與山僧步綠苔

齋居

謁來遊上國小隱寄沙門習靜探金籙
逃虛悟漆園天香流法界谷籟雜禽言
自爾喧中寂還應知者論

憑虛閣

傑閣懸崖一徑通閒來長嘯倚晴空
迢迢城闕烟花繞奕奕河山錦繡叢
弔古臨風懷謝眺登高欲賦媿揚雄
回看六代興亡蹟縹緲浮雲帳望中

雞鳴山秋庄上人先君舊主其舍暇日過憑虛閣訪之賦贈
訪道名山得遠公清脩慧悟許誰同
畱賓話舊開香積對境談玄了
性空花徑頻迴高士駕天風時引上方
簞卜鄰近就青巖曲尊酒相遇興未窮

登報恩寺塔十二韻

寶塔凌空起莊嚴冠尚方由來神斧斲
移鎮帝城旁影倒秦淮碧標含鷺嶺
蒼風鈴驚鳥度雲拱龜龍翔坐見毫光
燭應知舍利藏中宵看火樹慧日閃
金芒露范丹青麗風行草木香岡陵餘
王氣功德憶先皇絕磴盤雲上中原引
望長目紆青塞路身在白雲鄉恍若超
三界悠然洞八荒已知窮壯麗還訝出
蒼茫

燕子磯弘濟寺紀遊四首

海燕西飛去不回空遺磯石枕江隈
徜徉漫擲任公釣影動扶桑

海若猜

一片澄江浴日明海門東望是蓬瀛雲梯高策盧敖杖鷲巖時聞
子晉笙

摩天羣峭碧玲瓏壯觀緣憑造化功薄海雄開龍虎宅懸崖倒綴
蕊珠宮

郊原餘霽半晴陰散轡行穿綠樹林靈境芳辰難並得況偕仙侶
此登臨

書鴻鵠高枝卷贈如臯尹劉君

鴻鵠得腐鼠躊躇顧鳥號啞喧野田雀挾飛搶蓬蒿豈知鴻鵠志
一舉赴長飈高棲若木枝翛然肅竒毛翳君秉英植意氣橫紫霄
謁來止荆棘製錦試江臯拙宦鮮時好撫字多心勞化流聲已振
身誣道逾高世路劇險巖宦海殷波濤禍福遞倚伏達觀任逍遙

余行苟無闕遺榮道所寢曠然違矰繳乘雲恣遊翺顧彼羣鳥羞
雀趣舍何相遼

雨花臺

梁帝談經駐翠華傳聞此地雨天花散花落地終成幻往事令人
空嘆嗟故國春風遺燕雀羣峰靈氣隱龍蛇停驂欲問西歸路回
首臺城聚暮鴉

晚宿報恩寺翼晨遊天界碧峰諸刹

晚來避暑憇西禪晨起看雲興渺然偶愛棠陰穿夾道並飛芝蓋
歷諸天博山日午沉香爇蘆藟春茸散彩烟到處不煩霞外俎謁
來已備杖頭錢

游牛首山

龍從雙闕倚層霄嵌碧珠宮引望遙洞口真人不可見雲間釋子

坐相邀懸知法界無真相俯瞰峰文欲動搖共溯烟霞窮勝迹漫
因功德託前峰

獻花巖

靈崖猶著獻花名聞說高僧此締盟寶炬流丹光石室古苔分碧
翳山楹松窗暗射扶疎影泉竇時聞浙瀝聲歡賞未須愁日暮興
來卻憶盪雲行

自牛首晚過祖堂

牛山窮歷覽驚巖更徘徊巖翠迎驂舞霞文拂袖開檀林通覺路
蓮座軼浮埃已定栖禪處何妨落日催

宿祖堂贈海天禪師

披雲遊寶地入社訪名緇別院焚香處禪皈入定時高談空五蘊
妙悟得三支久負沈冥想相將汗漫期

遊靈谷寺

入門松檜雲垂幄繞徑烟霞錦作茵地隱居僧能愛客草深遊鹿
不驚人久淹世網慚真度坐對菩提悟正因試借巖前功德水憑
君一灑六根塵

書東陽陳君文溪卷

隱居卜築文溪曲水石滌洄清可憐野鷗相對少機事槁梧獨據
排冥筌逍遙已得滄洲趣徙倚長歌泌水篇倘遇金華牧羊子相
期散髮弄潺湲

遊徐錦衣西園

中山賁介開水邱近郭名園占翠微嘉樹巧雷遊鳳館新荷半覆
釣魚磯歌傳郢雪迎貂集簾捲湘雲放燕飛自古金陵歌舞地只
今行樂倍光輝

書山海圖慶楊封君杜夫人雙壽

我聞巫山十二峰雲間削出金芙蓉錦江西來繞其下靈源直與
滄海通揚子繪圖祝雙壽驅山走海羅堂中巨靈晶光驚噴薄宛
似蜀山渤海相臨衝川岳扶輿閎清淑海棠香國多華宗隱君家
世出弘農安恬履素遊鴻濛簾嬭更屬少陵裔蒙禕雜佩何種種
霸陵山中同隱操鹿門隴上追高蹤藏身自比巖下豹生兒並號
人中龍洛水孕程豈專美眉山毓蘇今載逢德星一簇射巴水斑
衣五色翔葱朧齊壽椿萱濡湛露聯芳棠棣輝春風披圖染翰媿
雕蟲望雲引手祝華封山高海深不可極眉壽偕老同無窮

贈周洞崖劉見西張葛野諸同志

就蘭有遺芬近朱恒得赤物性由漸摩友道貴薰炙卜子念離羣
庀父示三益緇衣託鄭謠盍簪著姬易維于敦古訓周旋式無斁

鼓篋慶休明結交盡英碩予方感嚶鳴何緣奉良覲春爾接殷勤
倏爾語離析投分追後時興言抱遺惜同心利斷金寸陰寶尺璧
與子競勉旃相期在夕惕

雙壽詩為楊太史父母賦

彤雲杏靄護嚴扉中有仙翁住翠微丹鼎瑞光含絳火瑤池爽氣
動斑衣雙星南極晨猶炯叢菊東籬晚更翻遙指海山應駐景還
看珠玉載相輝

郭東逸叟為雷給諫尊公賦

封君瀟灑宦情闌杖策歸來賦考槃松菊穩棲三徑晚烟波獨棹
五湖寬雲閒仙躅參麋鹿谷口清芬集鳳鸞更喜文郎傳素業佇
看風采動朝瑞

別楊方石歸西川三首

為問西行路若何瞿塘巫峽幾時過峨眉山月秋偏好坐泛空明
聽棹歌

秣陵江水送歸航西望盤叢鳥道長憶爾登堂稱壽日東籬正值
菊花黃

憑君問訊錦城東為報元方太史公往日明光廷諫草予方收貯
碧紗籠

讀盛山汪公詩四首

仙翁乘化返丹丘湖海詩篇爛不收秀句一塵元不染應知濯向
錦江流

世人誰復測沈冥天漢高懸處士星讀罷瑤篇還擊節疎窗落月
想儀型

習隱墻東不記年詩名當日滿西川青雲有子能傳業寂寞何妨

白未玄

高士風流夙所欽芸窗何幸獲瓊琳發城賸見烟霞氣擲地當為
金石音

別汪大池歸蜀

秣陵首夏初聯席萍水先秋又拂衣兩地看雲成悵望幾宵步月
共清輝山中高會今誰在海內知音漸覺稀獨抱瑤琴歸錦里漫
因離索委金徽

貞烈卷

先嶽千年正氣歇清史班班幾英烈詎意并禕粉黛人慷慨捐生
挺奇節憶昔羣盜擾西江萬戶千墟劇駭肩旄倪相望逐旌麾痛
惜蛾眉困顛越自許將身碧玉如忍使青蠅暫污蠟夫身委鑄已
先祖妾命如絲待何決叢棘懸崖豈足危隕首糜軀誠所悅絕壁

空招竇女魂悲風誰弔虞姬血君不見清風巔高戴業血痕點
棲荒碣千古莓苔字不滅

碧泉為玉山毛君賦

懷玉紆仙境緣崖引碧泉深渟涵璧瑩細沫散珠圓液滲天漿列
眾凝石乳鮮蒸霞溶靄靄滴露淨涓涓影倒千峰峭波縈七澤連
朝宗還赴海習坎竟成淵孺子滄浪咏莊生秋水篇何當訴薌瀨
散髮弄潺湲

書慈節堂卷

婉孌中閨秀艱危烈士心鴛鴦孤影寂鳳鈿翠光沈百鍊曹姬志
三遷孟母歲盛年甘苦節曠世振徽音壁隱機絲靜庭羅玉樹森
佇看花誥錫詎羨柏舟吟

丁未九月永康舟中

幾年結跡在丘壑每遇重陽亦自娛豈謂經年猶落魄遂令佳節
竟虛辜喜添綠水迎歸棹為憶黃花問濁醪聞道竹林稀舊侶故
山悲已就荒蕪

山中柬友人

振屣飄緜逝列仙芳遊喜及暮春天登高漫擬停雲賦招隱還歌
伐木篇幾樹香塵松燠日一林空翠竹浮烟飛觴吾有蘭亭集乘
興誰移剡曲舡

此首接明刻本應
在前已錄補并刪

半山藏臺
自此詩起
止為第三卷

玉山園附集卷之三十二

王叔果半山藏臺

永嘉王叔果有德著

族孫虞堯讓真子謹鈔

詩

戊申早春山居

暮倚寒檠倦廢書
攬衣延眺歷前除
蕭蕭翠竹干霄上
矯矯青松濯露餘
種菊預應苗舊圃
引泉還自決荒渠
日長課罷多幽事
漫向空齋賦索居

寄徐湖濱

丈人手持秋水篇
小築臨清隔世緣
萬頃玻璃明不夜
一川風月趣無邊
烟中時把任公釣
雨外頻移范蠡船
回首滄洲吾道在
拂衣何日弄潺湲

石室上人將入定過予山中言別賦贈

飛錫過丹丘談玄盡日雷散花臨曲水聽鳥隔林陬卽擬超三界
還應謝四流遙憐匡坐處滿室慧香浮

贈周芝澗二首

仙都有名山芝澗出其陽軒轅曾酌之乘龍升帝鄉復有茹芝翁
逍遙澗之旁饑餐白石英渴漱龍津芳臨流橫素琴長嘯眇八荒
神霄一何峻白日將翱翔寄言王子喬躡迹同蓬桑

燁燁澗畔芝泠泠澗中水臭味雖不同喻交乃相似伐木久不作
古道日已矣太息今人交甘言洵如醴一朝谷風生芝蘭化荆棘
而君多道氣邂逅見哀衷願言崇令德象帝貴太始

山房病餘讀參同契

病裏懷三靜牀頭枕一經偶因清夢覺頓燭道心靈閉戶含風氣

垂簾候月明千秋風葉盡到此寂無聲

書濟川舟楫卷贈郡司理黃公擢南戶部

金陵自昔稱佳麗城闕峩堦浮王氣萬戶春風雜管絃九衢芳草
交銜轡日暮江東隔雲樹渺渺仙槎此中去白鷺洲邊擁翠旂鳳
凰臺上賓芳馭眼中六代繁華地策馬相追日流憇放衙退食有
餘閒弔古悲歌無限意君才磊落賦瑰琦一麾佐郡甌江湄南川
式見頌聲作北俄承彩檄馳比來紫氣帶龍文黼座懷賢意正勤
聖朝創守重根本雨露不斷南天雲丈夫志在恢弘業榮進何須
論遲捷不見巖阿版築人一朝夢賚為舟楫幾歲滄溪臥叢桂風
雲已慶明良際四海風波總未平騫騰撇涉須君濟

松下騎驢

積陰欣晚霽夾道起鳴蟬拂袖臨丹壑乘驢控紫烟聯驅芳草地

散步夕陽天試問旁觀者何如孟浩然

端午觀競渡

湛湛方湖水平嘈嘈兩岸歡聲日暮雙龍正鬪一溪烟雨初晴

遊杜臬

相國衣冠何處藏空墳寂寂隱松篁玄臺漸覺丹青舊豐碣猶遺
翰墨光載酒喜逢黃菊候問途遙指白雲鄉日斜未盡登臨興更
欲移筇歷上方

九日騎驢登前岡

曉起臨池弄碧湍更攜杯棹走重巒慣乘鐵獺穿松過笑折茱萸
帶酒看古洞埋雲窺窈窕澄潭交樾映高寒勝遊耐可誇雙屐抵
掌高歌興未闌

張南明表兄過訪山中酌月

甫罷芳林賞還為清夜遊論琴思激楚飛竿助談優零露霑衣潤
疎星拂樹流蓬壺宛可即逸思欲橫秋

陳友山林後山有約登高走筆招之

秋到山中爽氣催况逢佳節思悠哉松閒石徑緣初埽水上芙蓉
已徧開剡曲興高應不減小山賦就若為裁候門稚子瞻雲迴佇
望飛轅谷口來

己酉中秋沙城觀潮

有約觀潮竟不違高秋涼月淡人衣魄雷銀漢光初滿影落金波
露未晞靜夜魚龍驚出沒遙天島嶼見霏微橫堤一望真奇絕擬
向乘槎萬里歸

九月望秋夜同諸君步月就松下觴之

散步出衡門悠然發清興商飈動高林繁陰委芳徑四瞻列宿垂

一展遙空靜月從松際看逾覺清輝勝呼酒集朋儕列坐依雲磴
占詩促羽觴行次迭酬應為歡總未央所憂在鉗罄圓景有時虧
嘉會難屢并流光去若馳且盡今宵醒

由峻畧入城

初日照瞳矓騎驢度遠峰蹄攢翻露草中拂掛巖松有約舟先待
無人碓自舂偶值山農獲攢眉說歲凶

遊尖山龍聖寺

娟娟烟蘿圍寶地霏霏香靄布璇宮清溪映帶千峰合蒼谷逶迤
一徑通饌客漫勞供野歎應門喜見有禪童晚來欲借青蓮榻半
臥淵明對遠公

龍翔寺訪石室上人

問道叩禪關聯鑣遡碧灣興隨清磬發目送斷雲還定久應生慧

觀空豈是頑相看醒大夢勞擾媿塵顏

飛翠樓為姜斗山賦

隱君樓閣倚林端窈窕朱櫺敞麗觀半壑陰霏浮掌動四簷空翠
灑衣寒松簧不斷含風聽竹黛偏宜帶雨看况爾高談能奪席令
余劇想一憑闌

壽封君項翁八旬

五花薦被天墀錫八袞新添海屋籌畫錦堂開春色麗華封祝獻
綵雲流瑤池望信傳青鳥渭水忘機伴白鷗漫佇安車來上國且
將秘籙問丹丘

重慶四壽為少參譚公賦

君不見西嶽諸峰高入雲峨眉秀拔尤絕羣崆峒陵歷不可極白
日照耀藏風神太白峻層屹天柱錦江垂練銀河分左右有仙人室

右有玉女臺靈氛鬱鬱杳無際古來嶽降能生才羨君應靈產其
地鴻裁一振夸人世載觀三葉迹休徵由來帝錫昭純懿丹丘窈
窕開福庭玉壘翠氣通青冥武陵相從躡高躅看弄碧水桃花明
沉聞千歲桃初熟曾向瑤池薦醺醪西望峨眉冷隱淪美人婉孌
顏如玉二翁燕坐漱玉津列仙彷彿時來賓回首二母踞雲幄宛
與神女同繽紛忽然丹壑羅芳芬飄飄飛下金鳳凰明明一朝生
羽翮乘風直入天池旁口銜天液出南海禎竒一吐成雲靄有時
歸泛三峽船滿堂垂白迎萊彩君不見眉山之瑞曠古無一門四
壽凝天和三蘇英譽更誰似由來人傑多徵符君家應期履重慶
地靈天瑞知先定羽化探元豈足論別有仁方能永命二翁翺翔
白雲岡二母委蛇碧玉房君載檐帷旬海憑雲遙祝時相望我作
峨眉歌詎擬岡阜章坐憶雲臺進羽觴歡樂遼遼殊未央

庚戌恩榮宴有述次嚴相公韻二首

昭代車書萬國同瓊林宴齎肅罄鴻拜嘉咫尺依天表際運豐亨
慶日中內醞御香杯泛綠曲江春色珮沾紅自憐此日承恩渥敢
負他年許國忠
仙風春拂杏筵開星弁繽紛集俊才燁燁奎光騰紫極葱葱雲氣
護蘭臺望中境入疑蓬島謹處聲聞訝地雷何幸叨塵嘉宴未瞻
恩欲頌漫遲迴

贈鄭篁溪司諫督學江右

幾年聯珮侍承明聲采翩翩動玉京焚草故隨唐補闕談經新集
魯諸生夜占牛斗龍光近秋入匡廬客夢清不是君王疏耳目要
令多士識儀型

出郊

首夏郊原暑氣微
芳遊初試芟荷衣
出門頓覺紅塵遠
倚馬遙看綠蔭肥
滿眼園林圍灌木
諸天鐘磬出林扉
堪憐到處多芳草
莫訝前村已夕暉

晚憇華巖洞

誰闢藏經處
穹然一洞天
雲深埋寶相
石圻現青蓮
坐月依雙樹
臨風憶五弦
願言分半榻
向晚共棲禪

碧雲寺宴集

芳樹碧連天
尋幽此楚延
石甃懸磴瀉
雪竇倚雲穿
興至清歌發
風迴梵樂傳
羽觴飛片片
賴有酒如泉

香山來清軒同侯項二友小酌

息馬穿松叩梵關
憑軒意共野雲閒
玄陰倏合尊前雨
翠色平臨几上山
為問傳衣傷往事
誰能脫屣謝塵寰
且須對酒恣歡賞
莫

漫逢人說大還

同年沈繕部遣酒轂至香山走筆謝之

丘樊深處隱香臺
日午聯鑣拂樹迴
馬上回看青嶂合
雲閒忽見白衣來
山陰逸少饒新興
江左休文故妙才
已有金卮堪助賞
漫勞玉趾更追陪

賦得一清泉送陳一泉南歸

我聞容成太玉之洞天
洞天洞門迴注一清泉
萬竅溶溶迸蠅眼
一絲裊裊垂龍涎
釀膠有芳味
煮茗清香偏行道
試一勺頓覺煩想蠲
源頭渺渺竟莫測
傳聞此洞棲真仙
疑是丹成拋鼎去
畱此瑤液以涓涓
虎丘井金山泉一經品
第天下傳此泉固知非凡品
况在福地開仙源
世人於味但染指
選勝誰將續酈元
君家故住此山下
餘波直繞花堦前
墨池飛霧凝翠管
華蓋倒影涵青蓮
潛通鴈

沼浴日月遠滙龍首興雲烟送君都門正酷暑令人渴吻思潺湲
何當開襟一濯坐苔石風生兩腋心冷然

送戴金峰司教惠州

先生鬢序早蜚聲予也論交屬後生獻賦幾年同北上承恩此日
獨南征坡仙遺化知猶在鹿洞芳規賸可行預憶談經園聽處春
滿座列羣英

壽庫部計彝南尊公

仙翁口誦紫霞篇一室焚脩思獨玄架上絲綸初錫命壺中甲子
已周天靈芝夜長元陽洞彩紱春輝介壽筵萬里瞻雲何以祝
湖風月故無邊

題畫竹

誰寫淇園植亭亭玉萬竿晴空翻翠葆靜夜度青鸞勁節凌霄上

清陰拂座寒此君原不俗况復月中看

送座主翰林閔公督學山西

幾年簪筆侍明光乍奉天書向晉陽雅望久知歸董馬遺風應及
見陶唐文旌遙指龍門近繡服猶沾鳳署香悵憶春風方侍坐不
堪回首限河梁

送鄉友鄭晴川南歸

結束吳鉤出帝鄉飄飄仙旆帶恩光雲橫苑樹頻回首酒在河橋
好盡觴曉日江蒲迎雀舫秋風海錯集魚梁羨君歸泛晴川上簫
鼓中流樂未央

岫雲詩為同年江兩厓尊公賦

吾聞白鹿洞西有老翁翩翩鶴髮顏如童身謝紅塵棲谷口坐當
碧岫羅庭中庭中雲氣互吞吐杖藜出入時相從舒卷無心懶作

雨飄飄不繫還隨風顛景倒映天池水玄陰倏駐香爐峰盈虛變
態信無常來往長依丹岫旁氛氲五彩結不散此中疑有神龍藏
神龍在淵試一躍四山雲靄何茫茫有時從龍作霖雨會見神功
霈八荒

七月望京邸對月二首

涼颼一拭暮雲收坐見遙空皓魄流怪底清輝偏絕勝由來此夜
亦中秋

單衣對月覺蕭森旅館逢秋倍不禁卻憶故園當此夕各天未卜
是晴陰

雙壽詩為陳龍白太史父母賦

東園開壽域南極藹祥光純嘏由天錫休符應德昌引年榮漢傳
垂裕慶周姜象服還偕老文占早定祥鴻儀同肅肅鶴鬢兩蒼蒼

累薦金閨籍慵歸綠野堂持盈思抑損惟道卜行藏桑梓遺恩渥
山林化日長鑑湖同徼賜陶徑已開荒洛社高風在燕山世德彰
太和臻保合福履納平康孤悅懸華閣笙鏞隱洞房遐齡稀古有
初度及辰良菊綻秋方老花明春載陽宜陳三壽賦為介萬年觴
青鳥瑤池降黃流玉瓚將東皇迴日馭西母調霓裳劫外瓊花老
眉間道氣揚雲璈賡入調石髓遇成漿叩竹何須致蟠桃定幾膏
潘輿承燕喜萊彩儼成行範福由來備佺年未可量節同筠晚茂
算與鶴俱翔連理芝生圃和鳴鳳在岡藩邦徵德化華國盛文章
奕世叨年稚孤經仰大方未緣追杖屨幸復出門牆願效岡陵祝
憑雲意不忘

贈江右江翁

南州有高士鴻冥不可羈身依丹岫隱心與白雲期服食寒三秀

逃名賦五噫行看躋耄耆亦復混希夷

送葉鹿門之唐府良醫

禁柳飄飄白露餘煌煌京洛拜恩初幾年御鼎躬調餌此日王門
暫曳裾佇想仁風行紫陌兼聞古跡隱蒼墟官遊不減登臨興試
訪隆中舊草廬

送王南山貳寧州

俄聞新命下瑤墀試向黔中問路歧萬壑西來橫地險雙旌南指
逐雲移海邦近寶觀清操荒服來庭仰德施佐郡君家曾歷試佇
看繼美奮南陲

部試秋月

殘暑初收白露零三秋對月在瑤京影當瑤漢渾疑濕色映金扉
倍轉明薊北征夫占虜候天涯遊子動鄉情長門此夕難成賦風

送霓裳第幾聲

聖旦早朝

斗柄西垂月在庭披衣引騎候雞鳴金根電轉千門闢玉仗星羅
百燎明湛露均濡叨晉錫彩雲低駐護乾清微臣竊有祈天祝願
并韶音作頌聲

同房諸年友會於天壇病不赴柬鍾郭溪年兄

夏日懷仙侶乘風憇舞雩文園方在告雅會未能俱結駟尋瑤草
憑軒倒玉壺彬彬胥宴賞念少一人無

書芝麓春榮卷壽許子峻乃翁

仙郎身寄五雲邊東望瑤池啟壽筵獻歲喜逢初度日馳恩適際
古稀年漆園古樹春秋永玄圃靈芝雨露偏天錫湖山難老福百
年杖履羨遊仙

中秋賞月時寓給諫東華第官舍

每歲逢中秋不欲成虛度人事與天時往往嗟錯迕茲辰在京華
獨坐懷良晤偶赴西鄰招斗酒集朋故穹宇淨纖埃團團月東吐
寶鏡雲間飛皓魄杯中墮徘徊愛清光蕭森怯零露寒蛩鳴草根
唧唧如欲訴孤雁來何方迴翔薄雲路因之念離羣愴惻抱衷素
美人在各天從倚空延慕

答項思湯

一別勤相憶逢人說項斯自憐樗散質謬辱惠莊知文藻驚流輩
烟霞入夢思問君歸舊隱掃徑預相知

書樂邑趙君安愚卷

舉世皆混濁伯夷乃獨清舉世皆沈醉靈均乃獨醒所貴特操士
不與俗俱營渾沌既已鑿竒巧日縱橫談天與雕龍變幻倏難憑
而君尚韜晦不與羣智爭掩跡畎畝間顧以愚自名無競眾所與
隱脩德乃馨蚤著鄉曲譽頃膺郡伯徵爰知為善利收之在沈冥
春陵拙用賦洙泗愚見稱山木不才壽膏焚惟厥明美哉安其愚
滋以全吾生

書懿德流光卷

綽約神仙侶蕭森松柏姿盛年甘苦節永巷守清規百鍊曹姬志
三遷孟母慈華光沈翠鈿芳蔭長金枝肅肅雞鳴什振振麟趾竒
天潢滋衍派風木賸遺悲戚畹歸坤德宗藩仰母儀還應彤管紀
詎羨柏舟辭

送張南溟上舍南歸

此日張衡賦遠遊瀕年負笈返南州坐憐金谷虛高會悵望銀河
隔素秋萬里庭闈送入夢三邊烽火賸堪憂羨君歸去饒家慶歎

我周南尚帶雷

送金存菴年兄之南駕部

朔風催水堅飄霰忽已疑彤墀拜新命夙駕東南征南望金陵邸
雙闕何崢嶸渺渺長千里峨峨石頭城睠茲根本地畱守屬匪輕
簿書幸稀簡鄉關况可憑既逐祿養志還兼吏隱名雲山映粉署
芳草閒訟庭端居屏紛雜於以結幽情靜中會有得用處迺可徵
逐逐觴酒閒彼哉徒沈冥

題湖州施君北源卷

我聞崑崙之山控北極靈源直與銀河通懸流噴薄幾萬里古來
好事諸能窮滔滔南駛無時休餘波滙入苕溪流主人結屋倚清
瀨錦鳧文鶴相翺遊有時解帶晞風濯向洪流五色鮮予亦乘槎
天上客更期共溯斗牛邊

于

誰

茅山紀遊卷之三

茅山藏稿卷之四

詩

永嘉王叔果青德著

茅山紀遊十二韻

福地烟霞古丹丘日月偏焚脩通上國巨麗冠諸天雲蟲三峰秀
崖傾一徑懸貝宮浮瑞靄芳沼藏珠泉洞隱燒丹竈阡遺種木田
真詮不可問靈跡尚依然玄鶴空中舉斑虬象外騫銀牀虛抱月
玉壘靜生烟仙樂臨風奏芝緘濯露鮮陰霏瞻壑動複磴躡雲旋
振策窮幽勝振衣禮上玄試歌招隱曲聊續遠遊篇

辛亥春日同何春泉掌科林新菴中舍遊西湖

十年不到西湖上此日清遊春載陽吳苑亭臺重入望蘇堤桃柳
尚含芳蘭橈蕩漾和烟渡羽蓋參差傍日張醉後不禁懷古意喜
偕仙侶足徜徉

中秋寓縉雲公館是日別嚴中川陳理卿景晦姪對月有懷

旅館逢秋節愀然憶故鄉倚看松掛月愁對酒盈觴宿鳥寒驚夢

同築在茅山藏稿自此詩起至出黃州同對節即推將赤壁心為第四卷

流螢悄度光雲光天勞悵望彼美在何方

丁孤山憲副招飲西湖卽席奉酬

六橋烟景真奇絕况有飛甍俯碧灣
潦倒何緣追雅會清虛一望隔塵寰
諸天隱見憑闌外萬古興亡抵掌閒
莫漫臨風增感慨祇應酌酎對孤山

登金山寺二首

大江浮寶地慧日耀珠宮引手三山接
褰帷四際通恍疑躋絕嶠卽欲馭長風
到處論形勝茲遊詫獨雄貝刹中流峙
乾坤信偉觀陪都門外險法界眼中寬
石勢含波動潮聲帶雨寒乘風聊弭節
倚檻試呼壺

艤舟維揚待張甌江表叔同發

旅况搖搖怯路歧高秋風色動檐帷
南窺不見青鸞度北向空憐彩鷁馳
倏忽離鄉經月後淒涼矯首望雲時
偶從淮海需津遣底事連朝未解維

九日寓維揚不赴諸公登高之招適聞淮泗寇警感賦

憶昔茲辰在玉京詰朝候疏入承明
蚤承使命趨南服轉逐仙槎賦北征
列郡未消魚鼈患鄰州仍被虎狼驚
登臨漫訂龍山約慷慨誰當渤海行

書巖野卷贈江都閻春元

野遊喬蹤客巖棲夢齋賢未膺金馬詔
閒誦白駒篇淮海名方籍文園賦早傳
看君舟楫具應待濟商川

淮水汎濫乘舟入新城訪友紀事十韻

怪見江淮水汪洋接四天居氓如坐井
陸地總成川野穡秋無望村庖午未然
通闌稀馬跡頽壁上蝸涎墊溺誰能拯
流移更可憐

九衢舟盡達萬室磬同懸為訪淮南子因移刻曲船飛舫過市上
弭棹及庭前宅土思神禹乘槎憶漢騫卻疑圖畫裡欲沂斗牛邊
試向麻姑說滄溟今變遷

張甌江表叔新製拍板成索諸友題贈刻之戲占一絕時張
以尚寶謫官淮運

李謫仙
白板頻催悵別筵新聲低按紫簫篇春風吹入昭陽去應念當年

甲寅秋日遊仙巖訪石室上人時方舉廢喜而賦之二首

為愛溪山勝來遊不厭頻瀑花疑濺雨洞室可延賓葱嶺留仙蹟
曹溪結淨因何當飛錫至寶樹已先春
翠巘圍蘭若丹霞隱洞天廢興千古慨靈秀十方傳卓錫開初地
傳衣念宿緣誰能超累劫即此共棲禪

寓茅竹山菴作需於亭於巖麓二絕

幽棲同谷口跣步即玄林頓覺煩囂隔道遙足賞心
小構倚山岨行行藉休憇往來但憧憧誰解需于意

題龔郡公鴻洲卷

渺渺章江接漢流江門新漲白蘋洲高秋鴻雁蛩還集長日烟波
望轉悠遵渚漫思彭蠡陣隨陽終向上林遊雲霄萬里看橫絕濮
水潯陽兩地秋

題瑞邑胡君竹嶼卷

別墅開三徑叢篁挺萬竿晴空翔鳳尾春雨長龍孫坐對琅玕淨
行穿烟霧寒知君多雅尚應愛子猷看

抱病村居郡侯龔公見訪次韻奉謝二首

江城遙接暮雲蒼皂蓋翩翩渡野塘因歷海邦占堠堞還過村巷

課農桑村居久已稀迎送蓬戶何緣借寵光臥病有慚東道主敢
言疎懶似稽康

疎狂自分考槃流蚤歲南宮謬見收幾向文園需藥裏間從滄海
弄漁舟病憐對月寒仍怯坐憶吟風晚更悠海內於今談作者君
才無敵似楊劉

邑侯一石周公為見鶴伯兄作亭於鶴山之麓即白鶴亭故
址也扁曰鶴林論舊落成宴集

東郭原畱康樂名茲逢錄事草堂成松濤帶雨秋逾壯行黛凝烟
晚倍清坐對瀟湘融妙境醉聞禽鳥集歡聲送憐放鶴人何在唱
罷銅鞮感慨生

子猷愛竹住稽山茂宰風流數枉攀三徑重開芳蔭合一尊相對
野情閒褰帷指點滄洲近倚檻招呼白鶴還日暮放歌蒼翠裡不

知身世在塵寰

書郡丞黃公萱桂同春卷

郡齋高映五雲黃慶集瑤池薦菊觴堂北孤萱宜晚秀淮南叢桂
淨秋芳朱顏喜對斑衣舞鶴髮還膺紫誥光賸有傳家仁壽術何
須海上覓仙方

同諸兄弟宴集水心別墅東見鶴兄

吾兄寄跡水雲居恬曠由來與俗疎橘園花蹊穿窈窕松臺蘭榭
對清虛徵歌累見傳新調習隱時將課舊畬羣季偶同桃李宴愧
予才忝惠連如

秋日過仙巖喜諸廢漸舉

結跡趨名山披衣涉玄境煥然象界新逝矣塵囂屏古祠面水開
寶塔凌霄挺叢林列青松香臺依翠巖蘿徑通逶迤蓮房備幽靚

滿座凝妙香酌泉試佳茗淨苑久榛蕪物華茲管領移座坐梅潭
沿流沂皇井風葉逐杯翻巖瀑侵衣冷摩厓閱舊題臨淵鑑清影
夷歌調轉悠暮歸興猶怪溪碓亂秋聲禪燈畱夕景感時歲杪臨
繙經夜分靜相對結跏趺聞鐘發深省

乙卯二月七日遊仙巖是日賤生四旬

仙遊偶爾逢初度把酒臨溪感慨生四十光陰如夢蝶三月花柳
乍聞鶯點波青鳥窺人過綴壁丹霞映酒明此地由來多勝蹟便
從採藥學長生

芳洲歌為院判袁君賦

城中多少繁華地園林卻學江村制薜帶依垂接綺筵霞石平分
映珠翠輕蓋朝飛趙李家輜軒暮集金張第幽人棲迹江之洲風
烟縹緲含清秋石竇泉通尾閭脉竹藩雨帶瀟湘愁洲前洲後無

雜木年年種橘盈千頭祇同彼美尋芳草不向傍人說素侯沙水
縈迴隔塵境讀罷醫經時習靜井底清泉可濟人橘閒隙地還栽
杏杏花開時萑葉生秧青麥綠鳧羽輕袖中鐵笛人不識吹與神
龍波底聽一朝技癢太無那醫國轉蹈金門路朝回故態忍不得
還與唐羅籍草臥唐羅抗疏依林莽君亦緬作洲中想歸來風景
盡依然惟是華髮臨秋長聞君丹術蚤通神到處逢人話赤文相
期服食訪蓬島共向芳洲駕彩雲

冬日予將北上再過仙巖同年劉羽泉載酒來會畱連竟日

別去有作

峭壁新通一徑偏仙源深處水濺濺重遊喜見添幽勝久坐渾疑
隔世緣送酒白衣來共賞題詩青竹故應傳山靈不盡板畱意日
夕疎林鎖碧烟

行駐良鄉次暘德弟韻

嘹嘹枕上初聞鴈漠漠天涯得寄書青旆踰時淹遠道白雲何處
是吾廬輜軒絡繹真如水邑里逃凶半已墟咫尺承明行入覲願
將民瘼附公車

送詹範川改任中州次見詒韻

河陽重見栽花客燕市那堪折柳時策馬悠悠思遠道亡羊忽忽
噪多歧蒙茸雜樹藏朱邸點綴新荷漾碧池欲采羣芳贈君別停
雲何以慰吾思

送曹東陽二尹之無錫

承家文學蚤知名此日銜恩出帝京行色迢迢芳草路離歌宛轉
故園情三吳民力殊堪嘆四境烽烟尚可驚君去催科須軫念好
教課最比陽城

送章觀海分教延平

八閩佳麗屬延平況有名賢此地生棧樸菁莪揚聖化冰壺秋月
想儀型雲山列秀如開戟泮水分流可濯纓宴坐高齋何所事烏
皮几上有遺經

送黃松臺判泰州

憶昔過淮南艤舟廣陵驛邂逅泰守君抗談竟日夕與聞土風美
民生更殷殖拜命往茲邦為君喜動色此官不負君勉旃在脩職
邑有高人廬過之宜一式倚馬送君行悵望浮白雲

贈王大峻同年貳臬蜀中便道歸省二首

關中富英傑羨子早驍驍况屬名賢後應知世德光承恩過梓里
介壽引霞觴錦水迎慈養春風樂未央

捧命下金鸞霜旌拂曙寒燕雲停祖席隴樹近征鞍且喜鄉關近

何憂蜀道難行聞敷惠化西土頌安瀾

送林中洲判宿州

新命俄傳下建章雙旌搖曳睢陽符分天北司民穡地接淮西近
帝鄉漫唱驪駒催祖道試看驥足展康莊知君露冕巡行處他日
應封召伯棠

贈陳水心之星子簿

君家故住水雲鄉庭下春風列眾芳偶為浮名淹薊北更承新命
向潯陽東歸象浦開韶月西望匡廬接穎蒼佐邑行看徵德化漫
教青史擅仇香

丙辰武舉場中試二首

聖朝崇武為邊陲拊髀常懷頗牧思莫道穿楊能角技折衝萬里
始為奇

海內材官集毅中臨場校藝總稱雄要使雷寧透才意好斬樓蘭
報首功

雪夜汪龍洲宿兄過訪

雪聽叩門聲誰為訪戴行流連清夜話感激故人情對酒徵新令
談經憶舊盟看君沾醉後意氣尚崢嶸

贈吳老峰之廉州照磨

曉出彤墀對祖筵臨歧漫賦遠遊篇雙旌南指羊城迴百粵東來
象郡連船舫千家收海市檣柳幾樹淨嵐烟因君卻憶還珠事人
到於今作話傳

壽王少治尊堂時少治以秋官郎奉差便道歸省

西曹銜使命南極麗祥光青鳥瑤池降黃流玉璫將高車新里閭
喬木舊門墻花誥承恩疊槐庭錫允昌詩人歌福祿帝命祚忠良

少治尊公為驗封郎中抗疏廷杖鶴髮披貞素熊丸表義方松筠堪並操蘭桂勝餘芳王母遺珍果麻姑薦玉漿年年似仙侶共醉紫霞觴

書台友周君月洲卷

夾漱蕙葭秋水平小窗隱几對空明婆娑桂影浮沙動欸乃漁歌入夢清萬頃烟波同浩蕩百年世事屬陰晴棹擬向銀河曲傾蓋將尋玉兔盟

次見鶴兄病起韻有感時事并慰旅懷

病後逢秋意未舒旅窗相對只琴書且同尊酒歌常棣漫擬文園賦子虛勘破世緣真夢幻信知物理有乘除人生蹤跡如漂梗汎彼中流任所如

送張少南貳臨清

分刺名邦喜遂良都門相送故情長客裘已釋風塵殫仙旆新沾

雨露香向日褰帷瞻岱嶽乘春擁燾入齊疆清源近接金臺路早晚賢聲達建章

過平陰東梁後川寅丈

乘冬遊岱嶽停晚過平陰昨爾纔分袂何期此盍簪風烟寒歲促尊酒故情深試訂登高的先傳下里音

丁巳冬日登泰山

憶昔重華君東狩茲望祀登高小天下魯有宣尼氏斯人千載上高山同仰止謬哉秦漢皇封禪徒宣侈弔古有遺思俯瞰浮雲駛留宿泰山祇役遙乘傳憑高一振衣倚峰觀日出仗策駐雲飛曜氣連滄海靈氛護翠微貢香人絡繹爭締福緣歸

遊泰山遇同年章襟川二守同宿頂上

契濶驚時邁，遭逢慰夙心。塵途相勞苦，喬嶽共登臨。往蹟空雷石，高情信斷金山。齋清夜話四望，覺蕭森。

贈泰安寺徐頤齋

與君邂逅玉京時，對酒曾為岱嶽期。忽漫不逢東道主，徘徊空誦北山詩。仙遊疑出人間世，峻眺真為天下奇。台鴈東南仍勝絕，行當拂石為君遲。

闕里謁孔廟

帝命昌文運，宗邦產素王。當時環轍跡，萬古沐書香。仰止宮牆峻，瞻依俎豆光。杏壇沾聖化，蘭室藹餘芳。檜老應神護，經餘自壁藏。成身思罔極，稽首敬靡將。周覽爰興感，低回意不忘。

謁孔林

饗廟環洙水，玄林控魯疆。一坏同嶽峙，萬樹拂雲蒼。路駐祥符躡

廬存端木塲，憑高遠吊古。何處覓靈光。

登嶧山

嶧山東踞鬱崔嵬，仄徑緣崖半草萊。引手欲招滄海使，回頭惟見白雲堆。按圖永作名邦鎮，毓秀遂生名世才。賢聖故鄉俱在目，登高欲賦渺難裁。

戊午早春過呂梁同年王育泉畱酌卽席賦贈時育泉將輯洪志因贊之

百丈洪濤滾地來，谿研石磧倩誰開。順流還艤春風棹，獻歲初逢甘露杯。水部才名真不忝，蘭亭墨妙好憑裁。况君政暇多篇什，應有靈光燭上臺。

呂梁南望

二洪分宿海，千里赴江門。臨水莊言寓，排流禹跡存。沙洲餘凍解

野樹暮雲屯望入淮南境相將近故園

武林邂逅康裕卿以詩見貽倚韻答之

君本東南美人稱湖海豪談詩名藉藉閱世志囂囂雲樹分征旆
烟花動綵毫故山深宵處叢桂解相招

雨中同李五華張蘆村二庶訪集太虛樓

烟雨交霏處湖山入望時憑闌真絕勝把酒更相宜摩詰難為畫
坡翁故有詩登臨春霽好何日復招攜

金華道中

望望鄉關近油油春意融喜看農務俶漸覺土音同池草夢中綠
巖花雨後紅更憐歸計好白鶴伴青松

雨中過馮公嶺

郡峰合沓隱青螺石磴行盤帶萬蘿頰首故山今咫尺計程此地

鳥

幾經過年深館吏稀相識日午與人欲就舖莫厭歸途陰雨滯扁
舟東望渺烟波

過仙巖超覽亭作

芳樹新開倚翠岑石壇半護薜蘿陰珠林雨外浮香靄鷲嶺枝頭
和梵音花徑春遲紅寂寂梅屏霧擁綠森森幾年塵土傷奔走漫
對清虛一洗心

夜宿仙巖上方菴次王十嶽韻

卓錫何年肇冥棲此日求感時初入夏問劫幾經秋石隕淵雷震
窗虛樹靄浮縉經消永日對雨且淹留

同仲弟避警上方菴時倭寇肆掠諸鄉

雙飛黃鳥止丘隅避亂空山賦白駒入夜荒林雷虎跡懸崖飛瀑
瀉龍鬚兵戈紛擾何時息道路傳聞尚可虞咫尺音書成阻絕暮

雲凝望轉愁予

九日同周迪齋郡守遊四明育王寺

秋晚江村歷寶坊眼中風物已重陽東籬未見黃花綻古塔爭傳
舍利先忽報清風來皂蓋且憑高閣引霞觴謁來未盡登臨興無
奈心旌逐鴈翔

冬日宿報國寺贈懷西上人用陳蘇山韻

長途釋屐鞅薄暮憇香臺為問西天事初從北極來觀心同水月
守道在淵雷若悟無生理乾坤幾劫灰

己未會試院中賦

憶昔試春闈維今已十載祇役與校文俯仰覺欣慨昭代羅羣英
鑒識漸寡昧矢心對神明夙夜良匪懈魚目混蠙珠砥礪雜瓊瑰
欲求千里良須就驪黃外惟願得真才庶以答簡在

書抗義流芳卷

垂老猶能事折衝如公壯畧幾人同一身未受干城寄四境曾收
屏翰功精衛志吞滄海竭杜鵑聲斷暮雲重殊恩豈但酬遺烈聖
代由來欲勸忠

送邵玉潭令海門

磊落詞場早擅名一朝銜命試專城為憐宓子鳴琴日薰遂毛生
捧檄情麥隴春晴看買犢花封晝午聽遷鶯地偏吏事應稀簡臥
對棠陰正滿庭

送周東海令瑞金

君家故住碧山岑吏隱茲仍得瑞林庭署春回芳草合檐帷曉駐
白雲深虔南扶杖觀新化冀北憑鴻聽好音引首春陵風月近知
君政暇數披襟

壽同年陳蘇山母夫人

洞庭開壽域，婺宿霽祥光。瑣闥承恩渥，坤闈衍慶長。化行江漢俗，人仰孝慈鄉。鳳詒輝華誕，熊丸表義方。詩人歌介福，遊子念高堂。瑞草呈佳日，繁花映小陽。爰陳三壽賦，為介萬年觴。冠蓋如雲集，芝蘭繞砌芳。麻姑輸寶籙，王母調霓裳。願效脩齡祝，長如衡嶽蒼。

送蔡敬齋之廣西少參

秘閣操觚早，擅名竭來夏。省喜參承漸，無仲子登樓賦。虛厓中郎

倒屣迎羽檄，方馳需石畫。驪駒忽唱黯，離情粵中山。水鏡吟眺君

送項思文判沔陽

共說河東三鳳祥，羨君雲路獨先翔。幾年染翰歸春署，百里分符近帝鄉。楚澤風高鴻鴈集，湘江日暖蒹葭芳。先公遺愛留南國，到處應封召伯棠。

流

贈張小蘭表弟南歸

百年喬木相，臣家春署占名亦。寵嘉正喜趨庭過，帝里那堪判袂在天涯。攀翻空憶山中桂，窈窕從歌陌上花。江墅卜鄰原咫尺，何時共藉白鷗沙。

己未再試武舉賦二首

幾年竊祿在樞曹，兩見開科閱武髦。攘臂競誇能敵愾，不知誰似霍嫖姚。

伯樂能空冀北羣，豈無智勇冠三軍。征倭禦虜方推轂，莫謂承平止尚文。

南司徒蔡可泉公徙官過家壽母太夫人

八座新開畫錦堂，五雲遙護壽星光。瑤池望氣來青鳥，梓里承歡引碧香。東海仙桃供燕喜，北堂瑞草靜年芳。幔亭都獻千秋曲，鶴

舞歌樂未央

送都護劉漢瞻襲職歸

虎旅將軍少俊年新膺殊錫已光前豐城寶器初離鞘渥水神駒
蚤著鞭閫外誰能當屏翰南中尚未靜烽烟傳家忠義君應念好
樹勲名鎮海堧

送沈丹湖督學貴州

蘭臺聲望斗山高羨有鴻裁翊聖朝要使殊方觀禮樂遂承新命
下雲霄黔城桃李迎春郁富水風烟引望遙送別正逢黃菊候采
芳欲贈思怱怱

贈李少渠中翰使楚藩

蚤承恩命自三台暫奉天書下魏臺雲護龍光仙旆遠花迎虎節
錦堂開燕庭頻繞清宵夢郢邸爭傳白雪才未許星槎淹北上鳳

凰池水首重回

送余鯨山司教蘄州

潞河南望水雲平有客乘秋下洞庭折柳都亭牽別意米蘭湘澤
聽歌聲離筵正對黃花綻仙旆遙隨白鴈征卻憶青衿胥候集春
風絳帳檢騷經

送朱鴈湖丞鹽城

燕郊幾送鴈南飛喜拜新恩出帝畿鸞翮漫羨棲枳棘鵲音應已
報庭幃淮南自昔饒鹽筴境內於今苦歲饑朱邑循良惟子惠壽
陽新柳正依依

壽鄒東郭先生

近郭新開獨樂園瑤池西望紫雲屯心通物外春無度身在山中
道益尊瑞世鳳麟欣載觀成蹊桃李本無言百年道化流寰宇九

轉三華詎足論

魏連洲掌科父母受封歸省贈以十韻

瑣闥承恩渥重闈行慶長龍槎銀漢轉鳳誥綵雲翔駟馬榮鄉閭
三花引壽觴槐庭方席蔭桂籍蚤傳芳星集瑤池宴霞標畫錦堂
木公翰寶籙金母調霓裳簾度三青鳥花棲五色鳳綵衣供燕喜
玉樹儼成行桑梓情難切風雲計未央春明宜促駕有待賦長楊
送劉舉人還廣右

憐君獻賦未逢時獨馬衝寒去尚遲海內交情蘭並契天涯別意
鴈應知馬卿信有凌雲氣和氏無勞抱玉悲聖代方需調鼎手來
春早赴看花期

嘉靖庚申秋閱兵過居庸夜宿公署次盧文溪先生壁閒韻
先生初與先人同官駕部後改入翰林時余髫年侍教席屈

指踰二紀俯仰今昔悵然有作

疊嶂排雲暫此關由來天險詎能攀郵旌過往如梭擲粉堞逶迤
似玦環偶為閱邊聊駐節近聞退虜始開顏卻憐彼美遺音在讀
罷懷人彷彿閒

秋日閱兵畢兵憲栗健齋邀登八達嶺卽事漫賦次舜澤蘇
公韻

散軍聯旆越居庸引首燕雲氣象雄盤嶺行輿驚歷險高秋倚劍
欲平戎北門鎖鑰千年壯上谷風烟一箭通且喜河防新報捷運
奇制勝果誰功

過福泉寺同紀省吾年兄晚酌池上次壁閒韻

荒涼野寺近邊城中有溫泉可濯纓萬竅迸珠時混混一泓涵碧
自盈盈振衣散步占風色把酒臨池待月明願取餘波清朔漠洗

兵何用挽滄溟

同紀省吾兵憲閱兵過喜峰口適虜酋影克叩關乞賞聞予
二人至率其二子二女及親屬部落來叩拜城下影克卽朶
顏三衛襲封都督近年結姻北虜外假納款以要厚賞內蓄
奸謀而為窺伺邊臣不勝忿忿咸欲請上閉關以逞一擊予
聞而避之賦紀其事

喜峰雙口鬱嶙峋天界華夷自此分稽顙呼韓稱向化閉關光武
務脩文三秋邊寨嚴燧燧五色旌旗捲塞雲寄語胡兒休放牧
來韓范在中軍

碧潭雷總戎之子年少善射予閱武建昌試之因賦以贈
關西閱閱稔知聞渥水神駒更不羣白羽聯飛頻報鼓轅門爭羨
小將軍

烽

將軍年少似終童唾手能關五石弓萬里封侯他日事卽看豪氣
已如虹

同孟豐麓職方燕集觀海亭三首

百二重關鎮海隈羣山東峙更崔嵬登臨莫漫誇天險經略還須
屬雋才

朔雲蕩漾引飛旌碧海濤涵浴日明吞虜未紓投筆志臨風真有
掛弓情

亘海長城蔓草芊羸秦遺跡尚流傳浪花飛濺姜陵石匹婦銜冤
萬古憐

永平謁夷齊廟

祇役過盧龍言尋孤竹封二難伸大義千古仰高風北海冥鴻志
西山叩馬忠春深薇葉長試采薦祠宮

宋栗菴節推畱欵清風臺夜泛河上二首

故國猶存古廟深清風颯颯動高林移樽共展高臺賞興落平川
晚不禁

偶同仙侶駕方舟白露橫波正早秋靜夜星文搖水碧卻疑天漢
泛星槎

題王揮使甌西卷

湖海驅馳老護軍卜居西傍越江濱閒凭淨几披黃石醉倚晴窗
玩白雲三徑尚遲松菊主九山時集鳳鸞羣投戈解組他年事半
席花閒許我分

送何賓巖守潮州

歲晚分符出漢曹晴天野色淨林臯官程西指羊城迥巖表東來
象郡高已見風猷清犴犴還省德化擾鯨鰲樓船此去無畱滯早

慰潮陽屬望勞

送高西渠之德藩長史

佐郡曾從濟上來賢聲當日滿蘭臺莒莒鳳闕新恩下忽漫燕郊
祖帳開齊國共推曹相治漢庭爭惜賈生才細旃日午承趨罷妙
賞清歌取次裁

辛酉初夏同余右峰王兩溪二金吾徐養吾工部出遊西郊

宴萬錦衣園

窈窕名園接帝畿偶偕仙侶對芳菲扶疎綠蔭干雲上旖旎紅粧
過雨稀為愛清漪臨水曲更窮妙賞歷林霏望中彷彿江南景便
向紅塵欲拂衣

題太史葉瑞峰先生冊

先生雅望早登瀛清白傳家況有聲千載石渠傳董業一方山斗

仰韓情專祠已見供蘋藻故里堪嗟失典型繼序有人昭世澤
衣無分帳平生

贈萬廷尉父母榮封

闔闔雲垂引鳳凰殊恩申錫動鵷行錦堂瑞靄槐陰匝御苑春回
棣萼芳世譜他年傳勝事官林此日仰輝光聖朝大典因心制美
爾遭逢足對揚

贈曾源川寅丈尊公

西方有美人瑩然崑玉澤壯歲負才猷觀光賓上國雅志抗浮雲
冥心在泉石圖史日相親討論窮古昔經綸既有託豈必自我績
仗策東南遊匪徒祿養適寄傲湖海閒資以廣聞識徒倚懷故鄉
眷言返初役命賞杜陵居草玄楊子宅眉山秀在望錦江鮮可食
閒居樂事并外慕爰屏息仰觀霄漢上鳳雛振六翮

申潞石寅丈雪中見訪留酌次韻奉答

雪後方揮筭庭前忽叩門賞心宜取醉瑞應且休論媿我同聲和
多君道氣存側思僵臥者日暮黯銷魂

送許雙塘中翰奉使使道歸省

君家故擬竇燕山奕世承恩北斗閒制草暫捐辭魏闕皇華載賦
向秦關驪駒宛轉催旌纛紫鳳參差引珮環此去故園春正好滿
城花柳足追攀

寄趙霞山

與君燕市昔同盟荏苒星華幾變更蚤見賢聲傳澤國俄聞新命
下彤庭家園棣萼春芳靄尊酒柴桑樂事并况有鳳毛能趾美何
能雞肋更關情

壽庫部蔡蒼宇父母六旬

錦堂春色映芳卮彩綬雙垂獻壽時南望仙文輝斗極西迎王母
降瑤池懸車蚤歲推高尚舉案當年仰淑儀剩馥餘芳昭嗣服
英已占最高枝

送大官丞蓮岡族姪請假歸

燕京五月苦炎威一雨涼生送客歸賸喜鷓班方接武那堪鴈翅
忽分飛離筵此日情多悵訪族他年訂不違遙憶錦旋秋正好佇
看蘭玉長芳菲

送王歐涯分教寧化

文苑同遊憶往年一官今始寄青氈早懸旌旆辭燕闕獨紉吳鉤
向楚天泮水魚龍需雨化山城桃李競春妍羨君家學由來世好
把遺經淑後賢

送蔣龍谷分教衡州

旗亭尊酒話離悰行色迢迢向楚封衡嶽千年雄作鎮漢江十里
會朝宗春風時鎮蘇湖鐸細雨清聞天柱鐘覽勝談經應暇豫寄
書莫待鴈回峰

壬戌自武選轉官楚藩南歸過汶上述懷

首夏風猶穆長途日已西麥苗經雨秀柳蔭拂雲齊旅夢違鷓筵
鄉心逐馬蹄馳驅已厭數此去擬巖棲

月夜登烟雨樓二首

城西水面敞高樓四顧山光几上流乘月擘舟一登嘯何如庾亮
在南州

茲樓宛在水雲鄉月色低含樹影蒼聞道更宜烟雨景何時載酒
詠滄浪

北還寓西湖藕花居晚同葉益泉俞紹翠泛湖

萬里馳驅未息肩，偶因避暑憇西禪。
入門積翠多芳樹，近水浮香盡碧蓮。
問勝欲方外，蹟僑居且結靜中緣。
清風更喜來朋舊，傍晚猶移載酒船。

夏日晚集仙巖憇蓮亭

憇蓮欣有榭，宛在水中央。
雨過添新綠，風迴度暗香。
詩成青壁勒，酒至碧筒觴。
溪碓春雲爛，禪燈隱樹蒼。
聞鐘醒大夢，洗酌引清光。
頓覺煩囂遠，飄然御上方。

癸亥春初至郢中適戴金峰解官歸賦贈

念爾抽簪已夙期，何當傾蓋遽言辭。
青羶不負平生學，絳帳應牽別後思。
剡曲扁舟追舊隱，小山叢桂賦新詞。
他年歸到甌江上海，月川雲應我遲。

行部當陽晚過龍泉寺寺傍有胡文定公祠墓

漳河西望隱珠林，傍晚鳴鶻歷翠陰。
疊嶂勢蟠如鳳翥，古潭波淨有龍吟。
諸天累劫幾興廢，大地浮雲自古今。
慶有名賢遺蹟在，若為山水共高深。

過景陵聖臺寺

褰帷曉望綠雲齊，小結香臺寄水西。
忽漫逢僧談聖蹟，躊躇倚檻問幽棲。
曲池清淺蛙聲寂，旭日曛曛樹影低。
更有白蓮呈異實，由來幻種自菩提。
寺有小池，生白蓮，結圓實，而種不傳，相傳有高僧臨池誦經，見蛙鳴以菩提子投擊之，蓮遂變生，茲實今池中絕無蛙聲。

書風梧咏思卷為雷守劉姑山作

當年未遂祈天意，沒世長懷陟岵私。
共仰勲名依日月，猶疑英爽動旌旗。
風行梓里雷芳蔭，雲護泉臺起夢思。
天上春回濡雨露，高岡新長鳳凰枝。

豐樂驛新成上元日晚至

古驛荒頽經幾春，喜看輪奐一時新。
新意中雲樹，思招隱望裏烟波。
欲問津漫說輜軒，通上國且將杯酒對芳辰。
宦遊好擬身乘傳，素食空云志在民。

恭謁顯陵

玄宮縹緲接烟霄，大狩重開輦路遙。
曲曲江流堂內繞，英英王氣望中標。
林端靈露三花綴，殿上祥雲五色饒。
總是岐周鳴鳳地，萬年豐芑頌皇朝。

過黃州同劉節推遊赤壁劉名南金予已未會試場所取士末章贈之

吳魏塵兵自有方，詞人偶爾借平章。
蘇公兩賦原奇絕，萬古江山藉寵光。

赤壁磯頭烟水平，郡齋猶著雪堂名。
芳春行役聊紓眺，弔古臨風不盡情。

弔湘人遠水空波，夢雨祠荒碧蘚多。
君比賈生年更少，卽看搖珮步鑿坡。

溫州府

戊午八月廿六日校竟紹康記

知府古淵

狀

公